

12. oktober 2004

UKA 2004/25

**Aningaasarsianit akileraarutit pillugit Inatsisartut inatsisaata  
allanngortinneqarneranik Inatsisartut inatsisaannut siunnersuut.**  
(Aningaasanut Nunallu allanut Naalakkersuisoq)

**Akissuteqaat**  
(Aningaasanut Nunallu allanut Naalakkersuisoq)

### **Aappassaaneerinninneq**

Naalakkersuisut sinnerlugit Akileraartarnermut Akitsuusiisarnermullu Ataatsimiititaliaq, siunnersuummut annertuumik peqqissaartumillu suliaqarsimaneranut siunnersuummullu isumaqatigiissumik tapersiineranut qujassuteqarfigerusuppara.

Siusinnerusukkut nalunaarutigineqareersutuut Naalakkersuisut matumuuna allannguutissamut siunnersuummik saqqummiussaqqarput. Allannguutissatut siunnersuutip kingunerissavaa pisariaqavissuinnarnut annertusisamik ikiorsiissutit akileraarutit naatsorsorneqarneranni ilanngunneqartalernissaat, pisariaqavissuinnarnut ikiorsiissutit assigalugit. Tamanna pissuteqarpoq pisariaqavissuinnarnut annertusisamik ikiorsiissutit siullermik naatsorsuutigisatuut pisariaqavissuinnarnut ikiorsiissutinut tapertaasussaangitsut paasinarsimmat taakkunungali taarsiutaasussaasut.

Inatsisit nalunaarusiuunneqarnissaat imaluunniit aningaasarsianit akileraarutit pillugit Inatsisartut inatsisaat katersorlugit naqiterneqarnissaat siunnersuutillu pineqartup akuersissutigineqarnerata kingorna allannguutissat ilanngullugit ataatsimiititaliamit kaammattuutigineqartut Naalakkersuisunit maluginiarneqarput. Tassunga atatillugu ilisimatitsissutigissavara Akileraartarnermi Pisortaqqarfiup periarfissaq siulleq atorlugu aningaasarsianit akileraarutit pillugit Inatsisartut inatsisaat nu-taanngorlugit ataatsimoortillugit naqiterteqqinniarmatigit.

Ataatsimiititaliap akileraartarnikkut allaffissornerup pisariillisaavigineqarnissaanut pisariaqartitsi-neraanera Naalakkersuisut ilalerpaat, tassunga ilanngullugu pisariaqassappat Naalakkersuisut nangaanatik akileraarusiineq tamakkiisumik ilaanilluunniit qitiusumik ingerlanneqalernissaanik siunnersuuteqassapput, paasinarsissagaluarpat kommunit akornanni suleqatigiinnerit pilertortumik naammaginartumillu ingerlanneqanngitsut.

Naalakkersuisut kingusinnerpaamik 2006-imi upernaakkut ataatsimiinnissamut suleqatigiinnerit pillugit naliliinermik Akileraartarnermut Akitsuusiisarnermullu

Ataatsimiititaliamut saqqummiussaqaassapput pisariaqaassappallu inatsisissamik  
siunnersuummik saqqummiussissallutik.

Taamatut oqaaseqarlunga Naalackersuisut sinnerlugit inassutigissavara  
allanguutissatut siunnersuutip matuma pingajussaaneerpeqarnissanut taamatut  
isikkoqartillugu ingerlateqqinneqarnissaa.